
АФВ – ИНСОНПАРВАРЛИКНИНГ ЭНГ ОЛИЙ МЕЗОНИ: УЛАР ЭНДИ ЖИНОЯТЧИ ЭМАС

Энг улуғ, энг азиз байрам – мустақиллигимизнинг 29 йиллиги муносабати билан муҳтарам Президентимизнинг Фармонида биноан 113 нафар ҳамюртларимиз афв этилди.

Фарғона вилояти ИИБ да вилоят ҳокими, Ўзбекистон Республикаси Олий Мажлиси Сенати аъзоси Шухрат Ғаниев ушбу ҳуқуқий ҳужжат асосида озодликка чиққан 6 нафар фарғоналиклар билан суҳбатлашди.

- Бу дунёда халқимиз учун оила, фарзандлар бахти-қувончидан ортиқ бахт йўқ, - деди вилоят раҳбари. – Шу боис йўқотганда эмас, борида бундай неъматларнинг қадрига етиш, авайлаб-асраш керак. Буни ҳаёт дейдилар. Ҳаётимиз давомида ҳаммамиз ҳам хато қилишимиз мумкин. Лекин хатони ўз вақтида тан олиш ва тўғри хулоса чиқариш ҳам мардлик ҳисобланади.

Самимий суҳбат давомида 6 нафар фуқарога оилавий шароитини яхшилаш мақсадида нақд пул, ишга жойлашиш учун махсус сертификат топширилди. Айни кунларда вилоятимизда қурилиш-бунёдкорлик, маънавий-маърифий соҳаларда амалга оширилаётган кенг қамровли ислохотлар алоҳида эътироф этилди. Элу юртимиз ишончини оқлаш учун 6 нафар ҳамюртларимиз бундан буён астойдил меҳнат қилиши зарурлиги таъкидланди.

Қува туманида яшовчи Камолиддин Эргашев тақиқланган диний оқимлар таъсирига тушиб қолиб, 2010 йили суд ҳукмига кўра 16 йил муддатга озодликдан маҳрум қилинган эди. Давлатимиз раҳбарининг мазкур Фармони асосида у муддатидан 5 йил олдин озодликка чиқиб, 4 нафар фарзандларига ўзи бош-қош бўлиш имконига эга бўлди.

Учкўприклик ака-ука Фарҳоджон ва Рустамжон Шерматовлар телефонида норасмий диний манбалар топилиб, 2015 йили суд ҳукми бўйича 7 йил ҳамда 5 йилу 6 ой муддатга озодликдан маҳрум қилинганди. Президентимизнинг афв этиш тўғрисидаги Фармони асосида ака-укалар муддатидан олдин жазодан озод этилди.

- Эътиқодда собит бўлолмай, тақиқланган диний оқимларга аъзо бўлдим,-дейди Қува туманида истиқомат қилган Мержидин Патединов. – Жиноий қилмишларим туфайли суд ҳукми билан 13 йил муддатга озодликдан маҳрум қилиндим. Энг гуллаган ёшлик йилларим қамоқда ўтди. Муддатидан 3 йил олдин афв тўғрисидаги Фармонга кўра озодликка чиқяпман. Бунинг учун Президентимизга, халқимизга чексиз раҳмат айтаман. Бугун тақдим этилган сертификат ёрдамида тумандаги текстил корхонасига ишга кириб, оилам ва юртимиз учун ҳалол меҳнат қилиб ишончни оқлайман.

Фарғона вилояти ҳокимлиги Ахборот хизмати.

Facebook, Telegram, Веб сайт, YouTube

2020-08-28 17:32:03